

# Gou Ndaenggon, Gou Dwg Vunz Bouxcuengh

## ——Doeg 《Gou Haenh Guekcoj》 Miz Gamjsiengi

武宣县桐岭镇新龙小学六(1)班 Vangz Cinzsinh/黄晨馨

Haemh caemrwgrwg, gou naengh youq laj daeng ciensim doeg bonj saw《Gou Haenh Guekcoj》neix, ndaw sim gou roxnyinh miznaj fouzbeij.

Vunz guek raeuz dwg vunz miz cingsaenz cauhyuh hungmbwk haenx, guek raeuz ciuhgeq couh miz seiq daih fatmingz seiqgyaiq riuymingz. Seizneix, guek raeuz miz 56 aen minzczuz, moix aen minzczuz cungj miz vah swheij, miz di minzczuz lij miz cihsaw swheij. Lumj raeuz Bouxcuengh couh miz cihsaw swheij. Youq ndaw lwgda gou, Sawcuengh raeuz ceiq hawj vunz simmaez, youh dwg ceiq ndeiyawj! Vahcuengh raeuz dwg cojcoeng raeuz seiqseiq daihdaih cienz roengzdaeuj, Sawcuengh raeuz, dwg Gozvuyen vih raeuz cau okdaeuj! Ndigah, raeuz miz maz lijyouz mbouj gyaenz Vahcuengh raeuz? Mbouj hag Vahcuengh Sawcuengh raeuz? Mbouj dawz Vahcuengh raeuz cienz roengzbae? Hagdangz raeuz, Sinhlungz Siujyoz mboujdan son Sawgun, lij son Sawcuengh dem; youq dieg Gvangsih raeuz gwnz baizdou gak aen cwngefuj danhvei cungj yungh Sawcuengh Sawgun sij bw. Couh lienz gwnz mbawngaenz raeuz, hix yaenq miz Sawcuengh lumj Cunghgoz Yinzminz Yinzhangz geijlai geijlai maenz gij cih neix. Sawcuengh raeuz geijlai ndeidingq ha! Geijlai mizyinx ha! Ndigah raeuz wnggai gyaenz Vahcuengh raeuz, hix aeu



nyinhcaen hag ndei Sawcuengh raeuz. Moix mbat miz vunz cam raeuz dwg aen minzczuz lawz. Raeuz wngdang miznaj dwk lwnh de: “Gou ndaenggon, gou dwg vunz Bouxcuengh.”

Bouxcuengh raeuz miz haujlai ngoenzciet, lumj haemhndaep, sam nyied sam ciet hawfwen, seiq nyied cobet ciet duzvaiz……Gij ngoenzciet Bouxcuengh neix ceiq nauhyied dwg sam nyied sam. Moix bi daengz ngoenz haenx, raeuz vunz Bouxcuengh bouboux cungj sim' angq dangqma, daxbuz haetcaux couh naengj ngaiznaengj haj saek youh hom youh ngdeiyawj, hawj mwngz yawj le myaiz laebyoegbyoeg bae, mwngz nyaenx mbouj ndaej bae nyaeb gwn, va, ngamq daengz ndaw bak, couh hom daengz ndawsim; daxgoeng, daxboh gaj gaeq gaj bit, naengj nohgoeb, yaek dakdaih caencik baengzyoux; dahcej, daeggo muengz dwk cangndang gyaengigi yaek ganj bae hawfwen eu fwen. Ngoenzhaenx gwnz nazmbaeklae, gwnz bo, diegbingz vunz cien vunz fanh, dauqcawq cungj ndaejniy sing fwen goksasa, sing riu riuhaaha, mbanj Bouxcuengh raeuz bienq baenz haij singfwen, bienq baenz haij vuenzyungz.

Doeg sat bonj saw 《Gou Haenh Guekcoj》neix, gou vih guekcoj raeuz ngoenz yied ngoenz ak ndaenggon fouzbeij, gou hix vih raeuz Bouxcuengh saedcej ngoenz beij ngoenz vuenyungz roxnyinh miznaj! Gou gyaenz guekcoj raeuz, gou gyaenz minzczuz raeuz! Gou dwg vunz Bouxcuengh, gou ndaenggon!

(bouxlauxsae son'gyauq: Lungz Gingyi/龙庆煜)

## Naeuz Daxmeh Youq Rog

Duzroeg ndonj gvaq gij rongh fwjgyaepbya gyaendei de, eu gij fwen vuenheij de, vueng'vueng vatvat mbin dauq ndaw ndoengfaex bae lo.

Daengngoenz daenj gij fwjgyaepbya gyaendei de, hamj gvaq dingjbya ceiq sang de, menhmenh maranz lo.

Duz gaeqmehraiz ranz raeuz, goj mbouj daengx mbouj duenh heuh cibngeih duz gaeqlwg de dauq ndaw roengq bae.

Meh ha, meh guhlawz lij caengz dauq ne?

——O, meh ha, gou lumzbae lo, meh haetneix bae baihrog guhhong lo, bae gizgyae'gyae de aeu yw, haemhneix meh mbouj dauqranz lo. Gou guhlawz lij lumj baezngoenz youq bakdou caj meh guhhong liux dauqranz ne?

Meh ha, seizneix meh gwn caeuz caengz ne? Meh gaej aeu raemxndat ceh haeux gwn bw, yienghneix couh deng dungxin bw——Dwg mwngz ciengzseiz yienghneix daengq gou bw.

Duznon seiqhenz baihrog ranz, guhfwen nauhyied lai.

Aenmbanj mbiengj bya de, cienz daeuj geij sing ma raeuq.

Ronghndwen dingjbya, daj bakdangq iet fajnaj luenzlulu de haeujdaeuj, daengz gyanghwnz lo.

Meh ha, mwngz guhlawz lij caengz ninz ne?


——O, meh ha, gou lumzbae lo, meh ngoenzneix okbae guhhong, bae gizgyae—



gyae de aeu yw, haemhneix mbouj dauqranz ninz lo. Gou guhlawz lij lumj baez ngoenz ninz ndiu couh heuh meh, yawj meh youq mbouj youq henz ndang ne?

Meh ha, seizneix meh ninzndaek caengz ne? Meh gaej iet genfwngz ok ndaw moeg daeuj bw, yienghneix couh dwgliengz bw——Dwg mwngz ciengzseiz yienghneix daengq gou bw.

(Daj 《Bonjsei Sim Lwngnyez》(Veiz Gizlinz raiz) senj okdaeuj, Lwgfwnz-meh/卢奋长 hoiz)



## Seizcou Daeuj lo

Seizcou daeuj lo, mbaw-faex loenq liux lo, daihdeih lumj daenj hwnj geu buhbwn henjgim ndeu. Doenghgij mbawraeu hoengzoq baenz mbaw baenz mbaw biu doek roengzdaeuj, lumj baenz duz baenz duz mbungqmbajmbin nei.

Youq giz mbouj gyaenz, miz go'ndae ndeu, mbaw cungj loenq liux, gij makndae henjgim vanzlij venj youq gwnz nyefaex, lumj baenz aen baenz aen daengloengz, maezvunz dangqmaz. Baenz gyoengq baenz gyoengq lwngnyez diuq-diuq yatyat angq dangqmaz, gyoengqde yaep ndeu yawj gij makndae henjgim, yaep ndeu youh buet deuz lo.

Ndaw gunghyenz vagut hai lo, gij hoengz lumj faez—

mbaw, gij maeq lumj fwjgyaepbya, gij hau lumj fwj-hau, vava loegloeg, ndeiyawj dangqmaz.

Yienznaeuz doek mwi lo, danhseih daxgoeng gocoengz vanzlij daenj buhraez heu-oiq, yienghsiengq ndaenggon dangqmaz.

Mbwn liengz lo, doenghgij duzbid ceiq gyaenz ciengqgo haenx ndoj haeuj ndaw rungj daxmeh bae menhmenh ninzndaek lo. Noucoengz iq hix vuenh geu buhbwnyungz hung nanwtntw he, caeuq gyoengq doih youq gwnz ngeiqfaex diuq bae diuq dauq, dwggayez dangqmaz.

Seizcou caen gyaendei, gou gyaenz seizcou.

(Goh Cinzrui)